



Ence l'Arziscop de Trent Bressan é ruà ta mont per l'ocajon. (Foto: Ivano Winterle)

"Festa ta Mont": n suzess amò maor che l'an passà!

Presciapech 12.000 persones é ruèdes te Mesaselva, a pe o coi pulmins, per se goder la mont, la magnadiva, i spetàcoi e i jeghes sporc dal comitat de endrez e da n muion de voluntadives

Poza – Amò più jent, amò più scomenzadives, amò più bel! Ence se l bilanz definitif di numeres l'é amò da fèr fora, ch'est l'é de segur l bilanz generèl de la II edizion de la "Festa ta Mont", che per doi dis à portà te la mont de Poza, zenza auti ma demò a pe o coi pulmins, entorn 12.000 jent. Nience la tampesta de la domenia domesdi à roinà più che tant la festa, e chi che no se à lascià sperder jù da mingol de èga i à podù amò se goder l bel de la mont. "No l'é mia sori troar na organizazion che te sporc soeie, pievia e ence bòzole" disc grignan l president Roberto Bertacco, content de l'ejit de la festa. Ma aldelà di sgherc, l Comitad di "magnifici 7" de la Festa ta Mont l'é jà dò che l se peissa co fèr per comeder chi dotrei picoi problemas

che a endrezèr na festa de chesta sort, enceben con na organizazion da ge fèr dassen i compliment, pel sutèr fora. Un de chisc l'é stat la couda che la jent à cognù fèr per ciapèr l pulmin a se n jir en fora la sabeda de net, ma per ch'est dalbon no se pel fèr trop, ajache più che 10 pulmins che jia inant e endò i se aessa demò dat d'empaz. "Per n auter an aon pissà de se endrezèr a dèr fora mingol de the o de brulé" disc amò Bertacco. Ence per chel che vèrda l spetàcol de la domenia sera, l Comitad é dò a pissèr a vèlch mudament, valutan per ejempie se fossa da l tirèr en ite zaolà più vejìn a la festa enveze che fora i Pians da l'Ancona, e magari da l meter en program ence la di dant.

Per l rest dut à garatà dassen delvers: 18 stonc endrezé da la

sociazions de volontariat à sport da magnèr e da beiver per contentèr la picola e la gran fam e secodir ogne gust, ence i più senestres; jan stroz a pe ta mont l'apetit cresc, e defat daperdut l'é stat sbetà i magasins. Apede a la speisa, lèrga a la proponetes desche la esposizions de retrac veies e de la besties del bosch, i jeghes sportives per gregn e picoi desche la trata con l'archet, la teleferica, l saut tel fegn, i tràmpoi o l schi sun pra. E dapò mùsega de ogne sort, portèda dant da sonadores e gropes desferenc.

N muie aprijà l "vilaje medieva", teater de rievocazions storiches e del spetàcol su la conties e lejendes ladines, portà dant la sabeda e la domenia domesdi. Chiò la sabeda sera se à podù veder i jeghes de

fech del grop de figuranc rué da la Republica Ceca, dant de mirèr l splendor del Col Ombert dut enlumenà.

La domenia la Festa ta Mont à abù n ghest de eccezion: te Mesaselva l'é ruà l'Arziscop de Trent, che à ofizià la messa conzelebrèda dal piovon don Giuseppe e da P. Alberto Dellagiacom, e dò no l se à fat prèr a jir fora per duc i stonc a saludèr i voluntadives che lurèa e a cercèr vèlch.

La prejenza de Mons. Bressan, à onorà la festa e didà a tirèr te la mont de Poza amò più jent. Pecjà per chela nigola che domesdi a fat sciampèr tropes e desfridà l'aria, ma da sera ti Pians da l'Ancona i era amò de n muie a se goder l spetàcol che à portà dant la storia de "Lidsanel" per la regia de Erika

Castlunger, con la sugestion de la lumes tel scur de la net ta mont, la bela interpretazion di atores e la museghes dal vif de "La Zag".

A chisc ge é jìt l batiman che à serà sù la festa, ma n batiman auter tant lonch ge va a duc chi che à endrezà, enjignà, portà stroz e dat fora roba da magnèr, sonà, metù a jir jeghes e entrategnimenc, coordenà i pulmins, destacà biliee e fat meter via delvers i auti.

N bel recort de la festa e de chi che à tout pèr se pel l'aer ence ch'est an travers n muion de foto fates da Anton Sessa e Robert Bernard. Vèlch una la publicon ence chiò, l'autres é da poder veder sul sit internet de la festa: www.festatamont.it

Lucia Gross



Gran sodesfazion del grop di organisadores per l bon ejit de la "Festa ta Mont". N muie de jent, la musega, i voluntadives, la prejenza del Piscop e la neva del vilaje medieva coi ciantastories che à anunzià l spetàcol "Lidsanel", à fat amò più bela chesta seconda edizion. (Foto de Anton Sessa e Robert Bernard, da poder veder ence sul sit www.festatamont.it)